

CHINESE-JAPANESE LIBRARY
HARVARD-YENCHING INSTITUTE
AT HARVARD UNIVERSITY
APR 15 1952

01

24

T5295 /714

Made in Japan

曲江集序

古今說者咸曰唐相張文獻公嶺南第一流人物也嗟乎公之人物豈但超出嶺南而已哉蓋自三代以至於唐人未之生盛在江北開元天寶以前南士未有以科第顯者而公首以道侔伊呂科進未有以詞翰顯著而公首掌制誥內供

哈佛大學哈佛藥劑
圖書館珍藏印

圖書印

奉未有以相業顯者而公首相玄
宗公薨後四十餘年浙士始有陸
敬輿閩士始有歐陽行周又二百
四十餘年江西之士始有歐陽永
叔王介甫諸人起於易代之後由
是以觀公非但超出嶺南蓋江以
南第一流人物也公之風度先知
見重於玄宗氣節功業著在信史

播揚於天下後世唐三百年賢相
前稱房杜後稱姚宋胡明仲謂姚
非宋比可與宋齊名者公也由是
以觀公又非但超出江南迺有唐
一代第一流人物也然公聲名燦
燁在人口耳非直以其相業在當
時且甚有文名史稱其七歲知屬
文張說謂其為後出詞人之冠又

與徐堅評其文如輕縑素練實濟
時用柳宗元亦謂其能以興業
著述予生公亦百餘年之後慕公
之為人童穉時嘗得韶郡所刻金
鑑錄讀之灼知其偽有志求公全
集刻梓以行世自來

京師游太學入官翰林每遇藏書家
輒訪求之竟不可得蓋餘二十年

矣歲己丑始得公曲江集於館閣
羣書中手自鈔錄僅成帙聞先妣
太宜人喪因携南歸期免喪後自
備梓刻之道韶適友人五羊涂君
暉倅郡偶語及之太守昆陵蘓君
鞞同知莆田方君新謂公此集乃
韶之文獻請留刻郡齋嗟乎公之
相業世孰不知其文則不盡知也

矧是集藏館閣中舉世無繇而見
苟非為鄉後進者表而出之天下
後世安知其終不泯泯也哉是以
不揆愚陋僭書其首

成化九年龍集癸巳仲春初吉

翰林院侍

誦學士瓊臺丘濬敘

重刻曲江先生文集敘

夫文獻豈以文不朽哉管人之言
曰太上立德其次立言甚矣其不
知言也夫惡知德與言非二耶仲
尼稱有德為有言而象易之黃裳
則曰文在中也暢於四肢發於事
業故夫六經之文有德之言也此
其所以與天地無終極而後世不

能違也如以言而已直刻雕藻續
等耳安所不朽公七歲能屬文十
三則上書廣州牧燕文貞公時度
頌誅其文敬禮之嘗與徐堅許如
輕縑素練實濟時用迨司納言中
書有所奏或不愜上意令易之輒
立就又嘗從上北狩對御撰文即
止慮十數餘並不具草是公之於

懺令刻而行焉可也乃謀諸太守
蔣公付邑令張君履祥董其後梓
焉魯魚亥豕則教官何徠校之又
索諸其後人得公遺像一幅命工
肖亟卷首於是茲集煥然一新稱
全書矣此則如水王公之功也嗟
夫夷考公事玄宗以開元二十一
年入相至二十四年而罷在相位

僅三年所耳中沮於林甫忠謀嘉
猷未盡施用而後世論開元賢相
每躋公於宗廣平之列而元之猶
有媿焉蓋勁氣直節垂照千古弥
久而彌光也士君子樹立在一時
而心術在萬世其耿耿朗朗使後
世仰之而無慙尚論之而無異議
此其為心必對天地質鬼神非苟

而已如此則不待功業文章而後
傳而功業文章亦且賴之以不朽
此詩人所以稱有斐而傳者歸之
盛德不能忘也公之以當之矣苟
徒以其文而已則如魯穆伯稱先
大夫臧文仲既後其言立謂之不
朽而孔子誅其心曰文仲其竊位
者歟苟如是則不如速朽之為愈也

己王公命予為序予陋安足以序
公文第自結髮已仰止于公至今
始得全集而讀之慶幸之私誠不
容已爰述表章之自且因是私告
吾鄉之後進讀公之文當觀公忠
孝大節而不徒以其文辭焉則王
公表章前達而興起後學之旨哉
萬曆甲申三月禊日

翰林院編脩大樓楊起元書

重刻曲江先生文集序
曲江張文獻公以直道相唐迄今
殆及千年士論翕然重公南紀之
有公猶之鵲首衡岳與天壤不朽
矣公有文集若干卷海內罕得見
之成化癸巳瓊山丘公始得於館
閣羣書中手自抄錄梓於韶韶之
有曲江文集瓊山之功也歲遠板

腐人家藏本罕存而贗刻金鑑錄
則市鬻而家有之予每撫之而興
慨焉歲癸未金谿如水王公以
侍御出僉粵憲備兵于韶甫下車即
詢是集久之得於人家已蠹蝕不
可讀公歎曰此一邦之文獻也弗
表章之後學何所興起且海內士
素慕公嘗以不獲見公之全文為

文何如矣顧此豈足以知公哉開
元末天子倦勤當是時林甫專恣
以善逢人主意而公立朝侃侃諤
諤不為脂皂巧合取容一時即如
郤儂客之封計祿山之叛何其正
而固也雖其言終沮闕不聽其國
是之定先見之明屬公矣李旣畏
惡公多所排抑公益屢躓彌堅愈

挫不折揮涕孤憤忠鬲可想往往
見於文詞是公之精誠所已蘊為
文明發之事業蓋章章如是庶幾
乎立德立言者而豈徒以文哉公
有集秘不傳久之我

明正文莊公搜采餘二十年始得館
閣羣書中而手自抄錄成帙誠重
之矣韶先太守治獮犇始刻之郡齋

顧歲久木蠹字殘闕不可讀余不
佞奉

上命分臬韶陽祗肅謁公祠欲取舊
本更梓之而郡守蔣君曲江令張
君僉以為請已復請于
兩臺於是督工竣事余讀之公之
微文與指母論為詞人之冠諸所
詠託或以興比或以諷諫風裁節

槩廩焉如覲其人第所建白預密
務公皆削藁莫可見即金鑑一錄
尤槩公生平集亦不具載則是稿
所削不既多乎則斯集夫亦據大
鼎而竊寸鬻耳嗟夫公以經術輔
佐人主燁致太平即古今論唐賢
相何可多讓也何構讒中沮遂使
相業弗永國凌夷至天寶之亂大

臣以出處卜盛衰詎不信已厥後
玄宗思之沒世而曰不復聞忠謹
言遣使致祠下噫斯公之所為不
朽也乎雖然古今作者藏之名山
以俟知已乃公獨藏館閣斯已偉
矣而六百餘年文莊公始得之藉
第令公之文不足表見况不藏于
館閣不藏于館閣亦自不傳而非

操行純一必不足徵信于文莊以
至必傳于後如今無疑也然則繇
斯以譚公果以文不朽耶果不以
文不朽耶不以文不朽不以文
不朽是可以知公矣梓既成余順
不佞忘其鄙陋而僭為之序

萬曆十二年甲申春孟吉日

賜進士第奉政大夫廣東提刑按察

司僉事奉

勅敕飭南韶等處兵備前巡按直隸
監察御史豫章金谿王民順書

唐丞相曲江張先生文集目錄

第十卷

頌贊賦

龍池聖德頌

開元紀功德頌

聖應圖贊

開元正曆握乾符頌

白羽扇賦

荔枝賦

第二卷

雜詩 樂章

南郊禮畢酺宴

早渡蒲津關

皇帝幸晉陽宮

二湘南出雀鼠谷

次成臯

過王濬墓

經孔子舊宅

經河上公廟

聖製賜諸州刺史以題座右

瑞雪

早發三鄉山行

溫泉歌

燭龍齋祭

喜雨

送十道使

次瓊岳

送李尚書入蜀

初出洛城

謁玄元皇帝

南郊樂章

龍池篇

大尉凱安之樂

燕國公赴朔方

早登太行山

登封禮畢酺宴

經華山

經函谷關

渡潼關

朝堂望南山

望秦始皇陵

賦芍藥

寓直夜聽蟬

從幸溫湯喜雪

秋夜望月

和秋夜望月

喜雨

折梅

直夜簡諸公

和裴侍中拜掃

哭李尚書

贈張丞相

酬宋使君

酬舍人見示

詠竹

小園夕霽

南亭宴集

答宗拾遺

贈兩省舊寮

答贈竹簪詩

答靳博士

酬宋使君

和幽庭春暄

贈韋明府

周判官改秘書

答綦母學士

酬王六書懷

酬王六寒朝

酬王履震遊園林

謁司馬道士

春望書懷

登恨峴山

重陽登龍山

上巳登龍山

晚齋東閣

登南樓

登高安南樓

望西山

石頭驛樓

登荊州城望江

登荊州城樓

秋晚登樓

登臨沮樓

登古陽雲臺

登薛公逍遙臺

蔡起居郊館

同田公賦詩

尋幽居處

遊石窟山

林亭詠

艸舍南園畦

臨泛東湖

荊州懷始興林泉

高齋言懷

遊家園

郡內閑齋

晨出郡舍林下

司馬崔頌和

晨坐齋中

賦不願秋蘭

城南隅山池

林亭寓言

舊居閑放

感寓

寄裴宣州

贈裴耀卿

酬裴耀卿

第三卷

雜詩

餞王尚書出邊

送趙都護

送使廣州

送姚評事入蜀

送竇校書

餞王司馬入計

東湖臨泛

餞梁明府

餞陳學士

通化門外送別

送楊道士

送李功曹

送趙少府

送李少府

送蘓主簿

送周判官

別鄉人南還

別孫侍郎

贈孫翊

江上遇疾風

初發江陵

自豫章南還

贈京邑親知

呈裴宣州

寄王震

懷趙二

南陽道中作

西江夜行

使還湘水

道中寄遠

湘中作

自湘水南行

南還湘水言懷

初入湘中有喜

商洛山行懷古

耒陽谿夜行

江上

自彭蠡湖入江

赴使瀧峽

湖口望廬山瀑布

彭蠡湖上

至玄武湖

入廬山望王瀑布

次廬山

巡屬縣道中作

贈京都舊寮

贈王司馬

奉使南海

湏陽峽

使至廣州

春江晚景

津亭曉望

曲江溪中

始興溪夜上赴嶺

藍田玉山南行

巡按自灑水南行

使還都湘東作

旅宿淮陽亭

望月遠懷

秋夕望月

詠鷺

詠史

世宗皇帝御製

四

世宗皇帝御製

五

勅賜寧王池宴

龍門旬宴

天津橋宴

上陽水牕旬宴

荆谷山集會

申王園亭集宴

樂遊園宴

逍遙公舊居

玉泉山寺

再往玉泉山寺

樊妃塚

戲題春意

月夜聞鴈

晨起對雪

庭梅詠

照鏡見白髮

折楊柳

巫山高

剪綵

聽筆

賦得自君之出

荊州作二首

在郡秋懷二首

獨處見群鶴

為罷守戀內職

初秋憶兩弟

見群鴈憶二弟

將還鄉示諸弟

叙懷二首

秋懷

雜詩五首

李尚書挽歌三首

蘇公挽歌三首

蘇氏挽歌三首

康司馬挽歌

題畫山水障

第四卷

勅書 制書

勅皇太子納妃

勅朝集使書

勅朝集使書

勅朝集使書

勅朝集使書

勅歲初處分

勅幸西京

勅令禮部掌貢人

勅置十道使

勅授十道使

勅處分舉人

勅停官祭贈太子

勅處分縣令書

勅處分縣內書

勅處分選人

勅議放私鑄錢

勅宴朔方將士

勅宴幽州老人

勅慮囚

勅擇日告廟

籍田制

諸王實封制

貶韓明制

廢王皇后制

停燕國公中書令制

第五卷

勅書

勅薛泰書

勅王斛斯書

勅張待賓書

勅虞靈章書

勅張楚賓書

勅牛仙客書

勅北庭將士書

勅張待賓書

勅將上百姓書

勅金興光書

勅牛仙客書

勅蓋嘉運書

勅王斛斯書

勅張守珪書

勅張守珪書

勅王昱書

勅投降奚等書

勅張守珪書

勅張守珪書

勅契丹王據埒書

勅金興允書

勅契丹王據埒書

勅契丹涅禮書

勅李歸國書

勅李歸國書

勅烏知義書

勅涅禮書

勅張守珪書

勅張守珪

勅張守珪書

勅張守珪書

勅張守珪書

勅烏知義書

勅諸將士書

勅新羅王書

勅渤海王書

勅渤海王書

勅渤海王書

勅渤海王書

勅烏知義書

勅王忠嗣書

第六卷

勅董懲運書

勅當息羗書

勅許齊物書

勅陰承本書

勅王斛斯書

勅蓋嘉運書

勅王斛斯書

勅王斛斯書

勅王斛斯書

勅王斛斯書

勅王斛斯書

勅蓋嘉運書

勅蓋嘉運書

勅王斛斯書

勅王斛斯書

勅王斛斯書

勅蓋嘉運書

勅蓋嘉運書

勅李過折書

勅突厥苾伽可汗書

勅突厥可汗書

勅金城公主書

勅王昱書

勅突厥登利可汗書

勅突厥可汗書

勅突騎施毘伽可汗書

勅突厥可汗書

勅突厥可汗書

勅突厥可汗書

勅吐蕃贊普書

勅章仇兼瓊書

勅吐蕃贊普書

勅吐蕃贊普書

第七卷

勅書 制書

勅吐蕃贊普書

勅吐蕃贊普書

勅金城公主書

勅吐蕃贊普書

勅金城公主書

勅吐蕃贊普書

勅張待賓書

勅牛仙客書

勅張待賓書

勅護密國王書

勅識匿國王書

勅勃律國王書

勅諸國王書

勅巒賓國王書

勅日本國王書

勅西南蠻首領書

勅靜州首領書

勅蒙歸義書

勅蠻首領書

勅安南首領書

南郊赦書

東封赦書

后土赦書

籍田赦書

第八卷

表狀

復中書侍郎表

進金鑑錄表

荊州謝上表

賀赦表

冊皇太子表

進白鹿表

為王峻謝表

獻馬聖真圖表

為何給事謝表

論教皇太子狀

論內勘婦女狀

論東北軍狀

論憂薛王疾狀

論薛王薨狀

請御注經狀

將士刊石紀功狀

傳授御注經狀

西幸啟期請宣付史館狀

為寧王寫經狀

賀張待賓奏尅捷狀

賀北庭解圍狀

賀奚契丹離賀狀

賀誅奚賊狀

賀破突厥狀

賀東北累捷狀

賀突厥要重人死狀

賀突厥傷死狀

賀突厥亡徵狀

賀破賊狀

賀賊遁走狀

賀雪狀

賀侍講賜衣物狀

賀雨狀

賀晴狀

賀雨狀

賀雪狀

賀祈雨有應狀

賀太陽不虧狀

賀祥雲見狀

賀麥登狀

賀進古銅器狀

第九卷

賀御製音義狀

賀論三教狀

賀御注經狀

賀皇太子製碑狀

賀昭陵徵應狀

賀上仙公主靈應狀

謝加章綬狀

謝集賢院學士狀

謝知制誥狀

謝兩弟移官狀

謝中書侍郎狀

謝賜麥麩狀

謝賜食狀

謝賜藥狀

謝賜尺詩狀

謝蒙太子書狀

謝兩弟授官狀

謝賜衣物狀

讓賜蕃口狀

觀御製喜雪狀

謝賜喜雪篇狀

讓賜宅狀

讓兩弟授官狀

謝赴祥除狀

進龍池頌狀

謝弟授官狀

第十卷

策書

應道侔伊呂舉對令策三道

上封事書

上姚令公書

姚令公答書

答嚴給事書

與李讓侍御書

奉勅送張說上賜燕序

第十一卷

雜著 墓誌

陪王司馬宴序

益州長史宴序

送高贊府序

登薛公逍遙臺序

閭太庾嶺路序

餞宋司馬序

送王長史序

韋司馬別業集序

別帝侍御序

獅子贊序

鷹鷂圖贊序

畫天尊像銘

裴公畫贊

宋使君寫真贊

惠莊太子冊文

祭舜廟

代祭故人文

祭李常侍文

祭洪州城隍文

王司馬祭妻父文

祭甄都督文

祭張燕公文

追贈祭文

張燕公墓誌銘

楊集墓誌銘

王府君墓誌銘

畢公墓誌銘

趙公墓誌銘

韋府君墓誌銘

第十二卷

碑銘

靳公遺愛銘

忠憲公裴公碑銘

徐文公神道碑

牛公碑銘

竇府君墓碑銘

呂府君碑銘

李公碑銘

李府君碑銘

徐樨碣銘

辰州瀘溪令趙公碣銘

唐丞相曲江張先生文集目錄終

唐玄宗贈司徒制

正大厦者柱石之力昌帝業者輔相之臣生則保其
雄名歿乃稱其盛德飭終未允於人望加贈實存乎
國章故中書令張九齡維嶽降神濟川作相開元之
際寅亮成功讜言定其社稷先覺合於著龜太懷賢
弼可謂大臣竹帛猶存樵蘓必禁爰從八命之秩更
進三台之位可贈司徒 建中元年

宋阜陵代唐玄宗贊曲江公張氏九齡

鹿入深宮花解愁牛登高鼎餽優休當時若聽履霜
語豈到峨眉山盡頭噫雖嘗因奏薦而問公風度蒙

太難而遣使祭饘不識噬臍禮意曲江何似荊州

淳熙拾叁年叁月巳酉朔

曲江小像一幅嘉靖甲辰夏岳購得之吉永豐同姓
人家以示知畫者謂爲吳道子真跡道子與公同時
像右傍有中書省印或公在中書時爲寫此像雖風
度凝遠而凜然巖峻有不可犯之色望之知爲正人
君子也上有宋阜陵題讚按宋錄唐名臣後惟狄梁
公段司農郭汾陽與公四家子孫當受官者持畫像
告勅玄宗御札請闕下爲左驗宣和中御札留秘府
像仍歸其家此其持請闕下受官經阜陵御覽而爲

之讚與史稱公弱體有醞籍玄宗每愛其風度岳往
來曲江見畫像數本皆爲豐碩盛麗有富貴氣疑非
當時真本及得此像然後知彼皆後人轉相模寫失
其真也然公以開元貳拾壹年拾壹月再入中書貳
拾肆年拾壹月罷政事其時主德寢荒小人朋比用
事公侃侃諤諤事無細大必力爭聽從者十不能二
三今觀此像義形於色若有不盡忠憤者玄宗以風
度愛重公要爲不知公觀者亦尚有以識此也耶乙
巳秋柒月旣望模一本遺守祠孫澤禧俾度祠下并
書其始末以告之遠從孫岳惟喬謹識

張荊州畫贊并序

中書令始興文獻公有唐鯁亮之臣也開元二十二
年玄宗春秋高矣謂太平自致頗易天下綜覈稍怠
推納浸廣若君子小人摩肩于朝直聲遂寢邪氣始
勝中興之業衰焉公於是以身社稷自任抗
危言而無所避秉大節而不可奪小必諫大必爭攀
帝檻曆天階犯雷霆之威不齊不止日月幾蝕卻爲
分明虎而冠之不敢猛視群賢倚賴天下仰望凜凜
乎千載之望矣不虞天將啓幽薊之禍俾姦臣乘釁
以速致戎詐成讒勝聖不能保禡我公袞寔于候服

身雖遠而諫愈切道既塞而誠彌堅憂而不怨終老
南國於戲功業見乎變而其變有二在否則通在泰
則窮開元初天子新出艱難久憤荒政樂與群下勵
精致理於是乎有否極之變姚宋坐而乘之舉爲時
要動中上急天光照身宇宙在手勢若舟楫相得當
洪流而鼓迅風崇朝千里不足怪也開元末天子倦
于勤而安其安高視穆清霈然大滿於是乎有泰極
之變荊州起而扶之舉爲時害動拂上欲日與讒黨
抗行于交戟之中勢若微陽戰陰衝密雲而吐丹氣
歛耀而滅又何難乎所痛者逢一時事一聖踐其跡
執其柄而有可有不可有成有不成况乎差池草草
沈落光耀者復何言哉復何言哉曹谿沙門靈徹雖
脫離世務而猶好正直攜其圖像因以示余觀而感
之仍作贊曰

唐有棟臣往矣其邈世傳遺像以覺後學德容恢異
天骨峻擢波澄東溟日照泰嶽具瞻崇崇起敬起忠
貌與神會凜然生風氣蘊逆鱗色刑匪躬當時曲直
如在胸中鯢鱗初脫激海以化羊角中頽靡天而下
無喜無愠亦如斯畫嗚呼爲臣儆爾夙夜

唐丞相曲江張先生文集卷之一

唐丞相曲江張先生文集卷之一

頌贊賦

龍池聖德頌并序

開元紀功德頌并序

聖應圖贊并序

開元正歷握乾符頌并序

白羽扇賦并序及御批

荔枝賦并序

龍池聖德頌

臣聞昔者玄德升聞皇天眷命元聖有作上帝何言

必見意於休徵不忘象於幽贊惟茲降鑒若曰專精
道周萬物者其神充功濟生人者其祥大粵若古始
肇有君臣巢燧之前寐寔無紀書契而後煥炳可觀
若乃鬼神睢盱品彙紛錯性命未正吉凶不定而太
昊氏將通其德則河爲之出圖人食未粒鳥獸是茹
時不畊稼器無耒耜而神農氏將教其本則天爲之
雨粟蚩尤不道炎帝不制銅鐵鑄兵豺狼橫厲而軒
轅氏將禁其暴則天爲之降玄女洪水方割下人昏
墊堯德莫能弭其災舜功不能除其害而夏后氏將
底其績則洛爲之出書自茲以還殆三千歲矣其間
水火更王雲物告符有若狼銜鈎魚躍舟素靈哭黃
星見豈不以湯德有慙武善未盡漢道旣雜魏方亦
偏唯以一至之應且爲興王之兆則未有錫真符聖
受明命遠與大禹相續超與上皇比崇如我國家之
盛者焉洪惟龍池蓋天之所以祚聖即今上下居之
舊直京師爽塏之所傍無竇澤中勿濫泉非常而靈
液涓流無幾而神池浸廣榮光休氣若煙若雲所未
嘗有則此之出清可以鑑而深不見底鱗介瑰詭於
物其中時莫知其所然日徒見其有異中宗採識者
之議壓王氣而來遊聖上處或躍之時出飛龍而合

應臨淄始封也邸第在馬上黨歷試也靈符紹至天
其以是求命我唐圖象丁寧有所底止其若茲也夫
成數有時而否至理無代而亡固在乎大聖之生乘
運而作鼓天下之動安天下之危故將順成功自古
之啓佑也如彼克定多難自天之叶贊也如此初中
宗韋氏后黨窺隙大盜狃於得志群慝起而擅權若
綴旒然當此時也天與若不取鬼謀或不協則我祖
宗之業無乃將墜而億兆之命亦猶倒懸聖上蹙之
提劍而起雷霆一奮袂袵以清內難旣衰外虞有謚
惟戴太上照臨萬邦實天之爲與人更始系皇統維

乾綱決綻補壞蕩瑕滌穢而乃闕典咸備舊章悉舉
處窮盡達在困必通品物資以再生寰區爲之一變
然後返華僞於朴還澆漓於淳以大道爲原以至仁
爲根動推是心以御於事人見德而興行神享誠而
介福故不在於刑罰不在於禱請大造裁成玄猷允
塞有如陽春播澤觸類皆滋太山起雲無遠不徧雖
昆虫草木與蠻貊要荒樂其所生安其所習在牛羊
而勿踐有干戈而載戢又况於衣冠華夏禮樂家邦
而不刑於斯頃不久於漸漬者也夫然何教非德何
化非經何能事之不舉何醇精之未極周溥洋溢於

穆緝熙至於太和莫不允若體侔天地之大事出皇王之表豈擊蹠曲拳盡禮極力將用彥聖不啻其口所能稱誦於吾君所可殆庶於至德且往者之有開也天感精以降聖聖敬命以奉天此誠有元則欽明文思及茲報本必嚴祗齋栗靈慶以屬之神化以答之與初相明其徵乃著絲綸先兆非篤信歟由是言之統天者人合符者聖而差德序命殊尤卓絕豈多乎哉至如古之興王必有所感五帝更尚五運旁通土者黃中之精於金爲王水者善利之物於土爲配苟膺期而有來必合德而爲表是則然矣天其或者亦以阜育群化發揮茂祉始告以聖有明徵終成乎帝之神冊因其立象之本會以相乘之數則載代六百歷紀千年變而通之胡可量也宗子宗正卿褒信郡王璆等若干人伯父伯兄仲叔季弟聚族相與詣闕上言天意昭著固已久矣人事符合亦云至矣而一德是建太階旣平靈臺靈沼赫赫明明天之爲大雖莫能名皇王之鎬豈無頌聲上初克讓抑而未許至於累請乃曰俞哉史臣不敏敢獻頌曰

茫茫元昊載凝載薄在帝庖犧繼天而作浩浩洪水包山襄陵舜亦命禹夏氏以興龍圖龜書二王是膺

湯武已下夫何足徵

右元命

於鑠巨唐乘運而起續禹之迹系堯之紀五聖在天
丕命曾孫高視河洛同符混元亦有黃龍出於靈沼
明明穆穆天子之表

右聖德

倬彼東井昭章于天沉精降液下爲靈泉靈泉有泚
其深無底泌之洋洋其甘如醴清德之鑑柔道之體
洪源濟規實天之啓

右靈泉

濯濯靈泉洞冥皇祇滋液流行化爲神池曰止曰行
惟聖之作匪鱣匪鮪惟龍之躍植物斯生動物斯樂
天眼有見曾是不涸

右神池

靈有休氣紛紛郁郁如山之包如雲之簇潛龍在下
瞻烏斯屋兆云其吉周爰咨詢旣契我龜又叶我人
鎬維舊京其命維新

右休氣

蜿蜿黃龍神池自出靈化恍惚噴雲沃日告帝之符
其儀孔吉或潛于泉或見于田與時順動亦應乎天

克配我皇無得稱焉

右黃龍

開元紀功德頌并序

臣聞蠻夷猾夏唐虞已然天之所生類不可絕嘗有拓境者矣而固也爲患或有款塞者矣必也無親是以古之哲王審其若此則限以荒服斷非純臣不貢不王武功居後不庭不率文德是先三代所以直道百蠻所以向化迨乎春秋之衰諸侯以力征伐自出戎心大啓謀夏亂萃于盟偪好王綱弛而若綴天道厭而將革則有強能攘劫暴惡交侵雖雜霸之無成亦反經之所取其負力者乃塹山堙谷盡境而築長城其黷武者則輓粟飛芻窮兵以耗中國又失於下策而悔在末年彼王畧之不恢殆千餘載矣夫有其虞而無豫思其患而不圖所謂能國將安貴聖物豈終否道非固窮鑑之者昊天救之者英主玄命陰騭昇付神武我太宗一戎衣而大定我皇帝再受命而太平不是古而務文不非今而忘戰以時變而消息元與天而合符日月之所照臨陰陽之所陶冶凡有在地莫不稟朔而東夏郡縣北際山戎先是四十年侵軼數百里自茲氣奪數以病告旣威讓之不恭且

力制之不可或朝或否爲虺爲蛇幽朔未遑以滅烽
邊城安得而弛柝曠日持久兵連禍挈率由事邊是
無寧歲二十二年春乃命右羽林大將軍兼御史中
丞幽州長史張守珪將中軍都督諸鎮雄名先路夷
裔生風載馳信臣繼發精卒戒嚴有赫張皇若神公
卿大夫未始測也將校部曲亦莫知也皇帝方日靖
以慮之乾綱以斷之初決策於九重已收功於萬里
矣二十二年冬十有二月中貴將命元戎受律三軍
疾雷於非時二庭喪膽於非意歆遁則衆潰不保歆
拒則兵鋒莫當因而僞降幸且紆禍遽圖反覆將肆

鷓張觀釁先人豈伊負我以間謀而情得乘猜携而
計從或竒兵以嘗或厚利以啗無何變作果自族誅
兇元惡首魁惑神誘假天威而無前覆鳥巢而何有
於是諸部大駭率衆復歸責以不義之尤捨其不臣
之罪旣服卽序有威且懷載籍以來固未之見也昔
我睿祖取句驪於拾遺今茲聖謀易林胡於反掌獻
功有續後嗣無忘百王所廢之勲四夷未賓之俗自
我底定巍乎登皇其若此也於是彼節使與羣帥困
東師之凱旋離而族談合而公議以爲主上憫一隅
之苦垂不伐之畧以計易戰以信去兵神斷自天虜

平不日且軍未血刃敵免膏原密承無方之謀坐致
不陣之捷有征無戰即王者之師歟而不彰美於吾
君得無臣子之罪不表聖於帝載曷稱文武之時乃
率其厲至於固請帝三讓德而曰俞哉夫曲成萬類
者天爲而不有下濟兆庶者聖成而不居物無謝生
於天雖云至道人無歸功於聖何以最靈雖無已無
名所宜絕於言象而惟忠與義固不廢於頌述大雅
云徐方旣同天子之功又曰明明天子令聞不已其
此之謂也臣再拜頓首敢獻頌曰

赫赫天威兮被遐荒 蠢茲山戎兮不來王命南仲兮
整六師出幽陵兮輔九夷 簸赤山兮蕩滄海弔無告
兮伐有罪徒不勤兮車不殆 虜衆驚兮兵氣倍昔負
固兮今安在魁自殲兮裔旣平 謀旣集兮聖自明我
不戰兮獻戎捷俾厥後兮揚天聲

聖應圖贊并序

臣聞啓聖者天也宜有以覺悟受命者聖也必有以
明徵故神不言而可知時將至而先兆當陛下龍潛
上黨也或託類於雲物或效靈於卜筮意者天之丁
寧垂象唯恐後時又以潞水之泓深山鹿之捷走馳
騎是獲厲流不濡非力所能以明或躡乾之上體時

在九四神道幽贊聖期密邇自後而占何著明其若
此蓋天福海內地降聖跡以瑞非常之后以决如神
之策至于再三明必信耳有郡掾崔弼時其從行見
龍騎先馳謂河流可涉亦旣數步遽已滅頂不沉也
安足以驗飛無凡也於何以昭聖事來自久命常惟
新臣不勝至願謹爲聖圖遂獻贊曰
龍之或躍泉有可深神亦成象化爲背禽凌厲是獲
明命則忱如彼從掾焉能不沉

開元正曆握乾符頌并序

臣伏見景寅制書以開元曆握乾符垂示天下幸甚
其沙門玄侶等所言益部著舊傳洛下閎改顓頊曆
推校最爲精密而曰後八百歲其曆差一日當有聖
人定之至于今曆果有差聖果有定誠非常之嘉應
曠代之靈符不可得而問也臣誠歡誠喜臣聞天道
先聖而啓期聖人後天而奉時不當乎天心不在曆
數不登乎聖道不合元符玄命定而王者應幽數起
而明者察故洛下閎極其數而知來著舊傳尚其占
而示後我皇帝無思而感自然玄同僧玄侶等幸會
而言豈云素慮非人事也非神道也天固已儲祥以
俟時積分以差日出入數代多曆年所疇人極力不

能課其祥上林雜候亦莫徵其失則明天意以俟聖
期期數未臻乃藏於密聖證將至如應如響彼幽深
之何有此會通之不謀所以下叶黃鐘上稽玄象以
和六氣以合三光復其見心間不容髮斗樞且運而
况於人特元氣已調而况於月令於戲天下之動日
用不知昆蟲草木生者自遂麟鳳龜龍靈者自瑞蠻
夷戎狄遠無不至山川鬼神幽罔不洎此聖人所以
定天下之象通天下之志天人之道備也昔者河出
圖洛出書自時既後符命非一空文而無應其殆乎
人爲實錄而有徵焉用乎龍負則洛下閎者此其神

乎不然是何見之明也夫聖有時而不作物無聖而
不覩仲尼感時於鳳鳥古人嘆壽於清河皆傷於不
達而恨於難見我后受成命重光乎文武累聖而無
竊殊祥而無數彼哀命之者曾不得而朝聞凡今之
人誠何幸而目覩由是觀之當其來運唐虞之屋可
封非其有時孔丘之徒不遇此千載之會也萬物豈
知其謝生於天乎兆人亦云忘力於帝乎微臣荷寵
靈揚休命則臣下之志在於盡美而惟天之大終莫
能名不勝區區敬獻頌曰
於皇惟后受命于天時來于今兆是厥先既定乃日

允叶斯年赫赫光明應于上玄

白羽扇賦并序

開元二十四年夏盛暑奉勅使大將軍高力士賜宰
臣白羽扇某與焉竊有所感立獻賦曰
當時而用在物所長彼鴻鵠之弱羽羽出江湖之下方
安知煩暑可致清涼豈無紈素采畫文章復有修竹
剖析毫芒提携密邇搖動馨香惟衆珍之在御何短
翻之敢當而竊思於聖后且見持於未央伊管臯澤
之時亦有雲霄之志苟效用之得所雖殺身之何忘
蕭蕭白羽穆如微風縱秋氣之移奪終感恩於篋中

御批答

朕頃賜扇聊以滌暑卿立賦之且見情素詞高理妙
朕詳之久矣然佳彼勁翮方資利用與夫弃捐篋笥
義不當也

荔枝賦并序

南海醜出荔枝焉每至季夏其實乃熟狀甚瓌瑰味
特甘滋百菓之中無一可比余往在西掖嘗盛稱之
諸公莫之知而固未之信唯舍人彭城劉侯弱年遷
累經于南海一聞斯談倍復喜歎以爲甘旨之極也
又謂龍眼凡菓而與荔枝齊名魏文帝方引蒲桃及

龍眼相比是時二方不通傳聞之大謬也每相顧閑
議欲爲賦述而世務卒卒此志莫就及理郡暇日追
叙往心夫物以不知而輕味以無比而疑遠不可驗
終然未屈况士有未效之用而身在無譽之間苟無
深知與彼亦何以異也因道揚其實遂作此賦菓之
美者厥有荔枝雖受氣於震方實稟精於火離乃作
酸於此裔爰負陽以從宜蒙休和之所播涉寒暑而
匪虧下合圍以擢本傍蔭蔽而抱規紫紋糾理黛葉
緗枝蒼鬱鬱而灑霏環合而芬纒如蓋之張如帷之垂
雲煙沃若孔翠于斯靈根所盤不高不卑陋下澤之

泪如惡層崖之嶮巖彼前志之或妄何側生之見疵
爾其勾芒在辰凱風入律肇允含滋芬敷謐溢綠穗
靡靡青英苾苾不豐其華但甘其實如有意乎散本
故微文而妙質葦葯房而攢萃皮龍鱗以駢比膚玉
英而含津色江萍以吐日朱苞剖明璫出罔然數寸
猶不可足未玉齒而殆銷雖瓊漿而可軟彼衆味之
有五此甘滋之不一伊醇淑之無準非精言之能悉
聞者歡而竦企見者訝而驚仡心志可以蠲忿口爽
可以忘疾且欲神於醴露何比數之湘橘援蒲桃之
見擬亦古人之深疾若乃卑軒洞開嘉賓四會時當

燠煜客或煩憤而斯果在焉莫不心侈而體忤信雕盤之仙液實玳筵之綺績有終食於累百愈益氣而治內故無厭於所甘雖不貪而必愛沉美李而莫取浮甘瓜而自退豈一座之所榮冠四時之爲最夫其貴可以薦宗廟其珍可以羞王公亭十里而莫致門九重兮曷通山五嶠兮白雲江千里兮清楓何斯美之獨遠嗟爾命之不工毋被銷於凡口罕獲知於貴躬柿可稱乎梁侯梨何幸乎張公亦因人之所遇孰能辯乎其中哉

唐丞相曲江張先生文集卷之一

終

唐丞相曲江張先生文集卷之二

雜詩 樂章

南郊禮畢酺宴

早渡蒲津關

皇帝幸晉陽宮

二湘南出雀鼠谷

次成皋

過王濬墓

經孔子舊宅

經河上公廟

賜諸刺史題座右

瑞雪

早發三鄉山行

溫泉歌

燭龍齋祭

喜雨

送十道使

次瓊岳韻

送李尚書入蜀

初出洛城

謁玄元帝

南郊樂章

龍池篇

太尉凱安之樂

燕國公赴朔方

早登太行山

登封禮畢酺宴

經華山

經函谷關 渡潼關

朝堂望南山

望秦始陵 賦芍藥

寓直夜聽蟬

從幸温湯喜雪

秋夜望月

和秋夜望月 喜雨

折梅

直夜簡諸公

和裴侍中拜掃

哭李尚書 贈張丞相

酬宋使君

酬舍人見示 詠竹 小園夕霽

南亭宴集 答宗拾遺 贈兩省舊寮

答贈竹簪詩 答靳博士

酬宋使君 和幽庭春暄

贈韋明府 周判官改秘書

答綦母學士 酬王六書懷

酬王六寒朝 酬王履震遊園林

謁司馬道士 春望書懷

登恨峴山 重陽登龍山

上巳登龍山 晚霽東閣

登南樓 登高安南樓

望西山

石頭驛樓

登荊州城望江

登荊州城樓

秋晚登樓

登臨沮樓

登古陽雲臺

登薛公道遙臺

蔡起居郊館

同田公賦詩

尋幽屈處

遊石窟山

林亭詠

郡舍南園畦

臨泛東湖

荊州懷始興林泉

高齋言懷

遊家園

郡內閑齋

晨出郡舍林下

司馬崔頌和

晨坐齋中

賦不顧秋蘭

城南隅山池

林亭寓言

舊居閑放

感寓

寄裴宣州

贈裴耀卿

酬裴耀卿

奉和聖製南郊禮畢酬宴

配天昭聖業率土慶輝光
春發三條路醑開百戲場
流恩均庶品縱觀聚康莊
妙舞來平樂新聲出建章
分曹日抱戴赴節鳳歸昌
幸奏承雲樂同晞湛露陽
氣和皆有感澤厚自無疆
飽德君臣醉連歌奉栢梁

世宗集卷之二
三
奉和聖製早渡蒲津關

魏武中流處軒皇問道迴長堤春樹發高掌曙雲開
龍負王舟渡人占僊氣來汀津會日月天仗役風雷
東嶺重關盡西馳萬國陪還聞股肱羣元首詠康哉
奉和聖製幸晉陽宮

隋季失天策萬方罹凶殘皇祖稱義旗三靈皆獲安
聖期將申錫王業成艱難盜移未改命曆在終履端
彼汾惟帝鄉洪都信鬱盤一月朔巡狩羣后陪清鑾
霸迹在沛庭舊儀覩漢官唐風思何深舜典敷更寬
家蒙扮榆復邑爭牛酒歡緬惟剪商後豈獨微雨歎

三后旣在天萬年斯石刊尊祖實我皇天文皆仰觀

奉和聖製同一相南出雀鼠谷

設險諸侯地承平聖主巡東君朝二月南旆擁三辰
寒出重關盡年隨行漏新瑞雲叢捧日芳樹曲迎春
舜詠先馳道恩華及從臣汾川花鳥意併奉屬車塵
奉和聖製次成臯先聖擒建德之所

天命誠有集王業初惟艱剪商自文武夷項在茲山
地識斬蛇處河臨飲馬間威加管運往澤流今聖還
尊祖頌先烈賡歌安用攀紹成卽我后封岱出天關

奉和聖製過王濬墓

漢皇思鉅鹿晉將在弘農入蜀舉長筭平吳成大功
與渾雖不協歸浩實爲雄孤績淪千載流名感聖衷
萬乘渡荒隴一顧凜生風古節猶不棄今人爭效忠

奉和聖製經孔子舊宅

丘門大山下不見登封時徒有先王法今爲明主思
恩加萬乘幸禮致一牢祠舊宅千年外光華空在茲
奉和聖製經河上公廟

昔者河邊叟誰知隱與仙姓名終不識章句此空傳
跡爲坐忘晦言猶強著詮精靈竟何所祠宇獨依然
道在紆宸睠風行動睿篇從茲化天下清淨復何先

奉和聖製賜諸州刺史以題座右

聖人合天德洪覆在元元每勞蒼生念不以黃屋尊
興化俟群辟擇賢守列藩得人此爲盛咨岳今復存
降鑒引君道慤懃啓政門容光無不照有象必爲言
成憲知所奉致理歸其根肅肅稟玄猷煌煌戒朱軒
豈徒任遇重兼爾宴錫繁載聞勵臣節持答明主恩

奉和聖製端雪篇

雜言

萬年春三朝日上御明臺旅庭實初瑞雪兮霏微俄
同雲兮蒙密此時騷切陰風生先過金殿有餘清信
宿嬋娟飛雪度能使玉人俱掩媚皓皓樓前月初白

紛紛陌上塵皆素昨訝驕陽積數旬始知和氣待迎
新匪惟在人利曾是扶天意天意豈云遙雪下不崇
朝皇情靚無數雪委方盈尺草樹紛早榮京坻宛先
積君恩誠謂何歲稔復人和預數斯箱慶應如此雪
多朝冕旒兮載悅想簞笠兮農節倚瑤琴兮或歌績
薰風兮瑞雪福浸昌應尤盛瑞雪年年常感聖願以
栢梁作長為柳花詠

奉和聖製早發三鄉山行

七言

羽衛森森西向秦山川歷歷在清晨晴雲稍卷寒巖
樹宿雨餘銷御路塵聖德由來合天道靈符即此應

時巡遺賢一一皆羈致猶欲高深訪隱淪

奉和聖製溫泉歌

雜言

有時神物符聖人去後湯還冷來時樹亦春今茲十
月自東歸羽旆逶迤上翠微温谷葱葱佳氣色離宮
奕弈斗光輝臨渭川近天邑浴日温泉復在茲群仙
洞府那相及吾君利物心玄澤浸蒼黔漸清神湯無
疾苦薰歌一曲感人深

奉和聖製燭龍齋祭

四言

上帝臨下鑒亦有光孰云陰隲惟聖克彰六月徂暑
四郊僭陽我后其勤告于壇場精意充溢群靈鼓舞

蔚兮朝雲霈然時雨雨我原田亦既有年燭龍煌煌
明宗報祀于以助之天人帝子聞詩有訓國風茲始

奉和聖製喜雨四言

艱我稼穡載育載亭如物應之曷聖與靈謂我何憑
惟德之馨誰云天遠以誠必至太清無雲羲和頓轡
于斯蒸人瞻彼非覲陰冥倏忽霈澤咸泊何以致之
我后之感無臯無隰黍稷黯黯無卉無木敷芬黩黩
黃龍勿來鳴鳥不思人和年豐皇心則怡豈與周宣
雲漢徒詩

奉和聖製送十道採訪使及朝集使

三年一上計萬國趨河洛課最力已陳賞延恩復博
舊衣深共理改瑟其咸若首路迴竹符分鑣楊木鐸
戒程有攸徃詔餞無淹泊昭晰動天文殷勤在人瘼
持久望茲念克終朝所托行已當自強春耕庶秋穫
奉和聖製次瓊岳韻

山祗亦望幸雲雨見靈心岳館逢朝霽闕門解宿陰
咸京天上近清渭日邊臨我武因冬狩何言是即禽
奉和聖製送李尚書入蜀

眷言感忠義何有間山川徇節今如此離情空復然
皇心在勤恤德澤委昭宣周月成功後明年或勞還

奉和聖製初出洛城

東土淹龍駕西人望翠華山川祇詢物宮觀豈爲家
十月星迴斗千官日捧車洛陽無怨思巡幸更非賒
奉和聖製謁元皇帝廟齋

興運昔有感建祠北山巔雲雷初締構日月今悠然
紫氣尚蒼鬱玄元如在焉迨茲事追遠輪奐復增鮮
洞府香林處齋壇清漢邊吾君乃尊祖夙駕此留連
樂動人神會鍾成律度圓笙歌下鸞鶴芝木萃靈仙
曾是福黎庶豈唯味虛玄
賡歌徒有作微薄謝昭宣

南郊文武出入鈞和之樂

四言樂章

祝史辭正人神慶叶福以德昭享以誠接六變云備
百禮斯浹祀事孔明祚流萬葉

奉和聖製龍池篇

天啓神龍生碧泉泉水靈源浸迤延飛龍已向珠潭
出積水仍將銀漢連
岬傍花柳看勝畫浦上樓臺問
是仙我后元符從此得方爲萬歲壽圖川

南郊太尉酌獻武舞作凱安之樂

樂章

馨香惟后德明命光天保肅祀崇聖靈陳信表皇道
玉戚初蹈厲金匏既靜好介福何穰穰精誠格穹昊
奉和聖製送尚書燕國公赴朔方

宗臣事有征廟算在休兵天與三台座人當萬里城
朔南方偃革河陽蹙揚旌寵錫從仙禁光華出漢京
山川勤遠略原隰軫皇情爲奏薰琴唱仍題寶劔名
聞風六郡勇計日五戎平山甫歸應疾留侯功復成
歌鍾旋可望枕席豈難行四牡何時入吾君憶履聲

奉和聖製途經華山

萬乘華山下千巖雲漢中靈居雖突密睿覽忽玄同
日月臨高掌神仙仰大風攢峰勢岌岌翊輦氣雄雄
揆物知幽贊銘勲表聖衷曾應陪檢玉來此告成功

奉和聖製早登太行山率爾言志

孟月攝提貞乘時我后征晨嚴九折度暮戒六軍行
日御馳中道風師卷太清戈鋌林表出組練雪間明
動植希皇豫高深奉睿情陪遊七聖列望幸百神迎
氣色煙猶喜恩光草尚榮罍罍稱萬歲今此復同聲

奉和聖製登封禮畢洛城醮宴

大君畢能事端宸樂成功運與千齡合懽將萬國同
漢醮歌聖酒韶樂舞薰風河洛榮光遍雲煙喜氣通
春華頓覺早天澤倍加崇草木皆沾被猶言不在躬

奉和聖製經函谷關作

函谷雖云險黃河復已清聖心無所隔空此置閔城

奉和聖製渡潼關口號

隱嶙故城壘荒涼空戍樓在德不在險方知王道休

奉和吏部崔尚書雨後大明朝堂望南山

迢迢終南頂朝朝闔闔前
竭來青綺外高在翠微先
雙鳳褰爲闕群龍儼若仙
還知到玄浦更是謁甘泉
夜雨塵初滅秋空月正懸
詭容紛入望霽色宛成妍
東極華陰踐西彌嶓冢連
奔峯出嶺外瀑水落雲邊
漢帝宮將苑商君陌與阡
林間鋪近甸煙靄逸晴川
旣庶仁斯及分憂政已宣
山公啓事罷吉甫頌聲傳
濟濟金門步洋洋玉樹菡
徒歌雖有屬清越豈同年

和黃門盧監望秦始皇陵

秦帝始求仙驪山何遽
十中年旣無效茲地所宜復
徒役如雷奔玆怪亦雲蓄
黔首無寄命赭衣相馳逐
人怨神亦怒身死宗遂覆
土崩失天下龍鬪入函谷
國爲項籍屠君同華元戮
始掘旣由楚終焚乃因牧
上宰議楊賢中阿感桓速
一聞過秦論載懷空杼軸
蘇侍郎紫微庭各賦一物得芍藥

仙禁生紅藥微芳不自持
幸因清切地遂遇艷陽時
名見桐君錄香聞鄭國詩
孤根若可用非直愛華滋

和崔黃門寓直夜聽蟬之作

由江有卷之二
蟬嘶玉樹枝向夕惠風吹幸入連霄聽應緣飲露知
思深秋欲近聲靜夜相宜不是黃金飾清香徒爾爲
和姚令公從幸温湯喜雪

萬乘飛黃馬千金狐白裘正逢銀霰積如向玉京遊
瑞色鋪馳道花文拂綵旒還聞吉甫頌不共郢歌儔
和秋夜望月憶韓席等諸侍郎因以投贈吏

部侍郎李林甫

秋天碧雲夜明月懸東方皓皓庭際色稍稍林下光
桂華澄遠近璧綵散池塘鴻鳳飛難度関山曲易長
揆予秉孤直虛薄忝文章握鏡慙先照持衡愧後行

多才衆君子載筆又辭場作賦推潘岳題詩許謝康
當時陪宴語今夕恨相忘願欲接高論清晨朝建章
和吏部李侍郎見示秋夜望月憶諸侍郎之
什其卒章有前後行之戲因命僕繼作

清秋發高興涼月復閑霄光逐露華滿情因水鏡搖
同持亦所見異路無相招美景向空盡歡言隨事銷
忽聽金華作誠如玉律調南宮尚爲後東觀何其遼
名數雖云隔風期幸未遙今來重餘論懷此更終朝

和崔尚書喜雨

積陽雖有晦經月未爲災上念人天重先祈雲漢迴

仁心及草木號令起風雷照爛陰霞上交紛瑞雨來
三辰破黍稷四達屏氛埃池溜因添滿林芳爲洒開
聽中聲滴瀝空處影徘徊惠澤成豐歲昌言發上才
無論驗石鼓不是御雲臺直頌皇恩決崇朝遍九垓

和王司馬折梅寄京邑昆弟

離別念同嬉方榮欲共持獨攀南國樹遙寄北風時
林倩迎春早花愁去日遲還聞折梅處更有棣華詩

和許給事直夜簡諸公

未央鍾漏晚仙宇藹沉沉武衛千廬合嚴扃萬戶深
左掖知天近南窓見月臨樹搖金掌露庭徙玉樓陰

他日聞更直中霄鶴所欽聲華大國寶夙夜近臣心
逸興乘高閣雄飛在禁林寧思竊抃者情發爲知音
和裴侍中承恩拜掃旋轡途中有懷寄州縣

官寮鄉園故親

嵩岳神惟降汾川鼎氣維生才作霖雨繼代有清通
天下稱賢相朝端挹至公自家來佐國移孝入爲忠
霜露多前感丘園想舊風扈巡過晉北問俗到河東
便道恩華降還鄉禮教崇野樽延故老朝服見兒童

和姚令公哭李尚書

貴賤雖殊等平生竊下風雲泥勢已絕山海納還通

忽歎登龍者翻將弔鶴同琴詩猶可托劍履獨成空
疇昔嘗論體與言每匪躬人思崔琰議朝掩祭遵公
作善神何酷依仁命不融天文靈北斗人事罷南宮
上宰旣傷舊下流迷感衷無恩報國士徒欲問玄穹
張丞相與余有孝廉校理之舊又代余爲荆
州故有此贈襄州刺史宋鼎
漢上登飛幟荆南歷舊居已嘗臨砌橘更覩躍池魚
盛德繼微眇深衷能卷舒義申蓬閣際情坦廟堂初
罷挹文章美人懷燮理餘皇恩儻照亮豈厭承明廬

酬宋使君作

時來不自意宿昔謬樞衡翊聖負明主妨賢媿友生
罷歸猶右職待罪尚南荆政有留棠舊風因繼組成
高軒問疾苦蒸庶荷仁明衰廢時所薄祗言僚故情
酬通事舍人寓直見示篇中兼起居陸舍人

景獻

軒掖殊清秘才華固在斯興因膏澤洒情與惠風吹
所羨應人譽何私亦我儀同聲感喬木比翼謝長離
價以陸生戒賢慙鮑叔知薄遊嘗獨愧芳評乃兼施
此夜金閨籍伊人瓊樹枝飛鳴復何遠相顧幸媿媿

和黃門盧侍郎詠竹

清切紫庭垂歲貌防露枝色無玄月變聲有惠風吹
高節人相重虛心世所知鳳王佳可食一去一來儀
和蘇侍郎小園夕霽寄諸弟

清風閭闔至軒蓋承明歸雲月愛秋景林堂開夜扉
何言蕪濟日尚與宴私違興屬薰葭變文因棠棣飛
人倫用忠厚帝德已光輝贈弟今為貴方知陸氏微
和常尚書答梓州兄南亭宴集

棠棣聞餘興烏衣有舊遊門前杜城陌池上曲江流
暇日嘗繁會清風詠阻脩始知西峙嶽同氣此相求
與袁補闕尋蔡拾遺會此公出行後蔡有五

韻詩見贈以此篇答焉

轍迹陳家巷詩書孟子鄰偶來乘興者不值草玄人
契是忘年合情非累口申聞君還薄暮見眷及茲辰
贈我如瓊玖將何報所親

酬趙二侍御使西軍贈兩省舊寮

石室先鳴者金門待制同操刀嘗碩割持斧竟稱雄
應敵兵初起緣邊勇欲空使車經隴月征旆統河風
忽枉兼金訊非徒秣馬功氣清蒲海內聲滿栢臺中
顧已塵華省欣君震遠戎明時獨匪報嘗欲退微躬

答陳拾遺贈詩

與君嘗此志因物復知心遺我鍾龍節非無玳瑁簪
幽素宜相重雕華豈所任爲君安首飾懷此代兼金
答太常靳博士見贈一絕

上苑春先入中園花盡點唯餘幽徑草尚待日光催
酬宋使君見貽

陟隣初稟訓獻策幸逢時朝列且云忝君恩復若茲
庭闈際海曲軺傳荷天慈顧已歡烏鳥聞君泣素絲
才明應主召福善豈神欺但願白心在終然涅不緇
武司功初有幽庭春暄見詒夏首獲見以詩

報焉

芳月盡離居幽懷重起予雖言春事晚尚想物華初
遲日暎方照高齋澹復虛筍成林向密花落樹應踈
贈鯉情無間求鶯思有餘喧妍不相待含歎欲焉如

贈澧陽常明府

君有百鍊刃堪斷七重犀誰開太阿匣持割武城鷄
竟與尚書佩還應天子提何時遇操宰當使玉如泥
酬周判官巡至始興會改秘書少監見貽之

作兼呈耿廣州

惟昔遷樂土追今已重世陰慶荷先德素風慙後裔
唯益梓桑恭豈稟山川麗子時初自勉揆已無兼濟

瘠土資勞力良書啟蒙蔽一探石室文再擢金門第
既起南宮草復掌西掖制過舉及小人便蕃在中歲
亞司河海秩轉牧江湖濫勿謂符竹輕但覺涓塵細
一麾尚云忝十駕宜求稅心息已如灰跡牽且爲贅
忽捧天書委將革海隅弊朝聞循誠節夕飲蒙瘴癘
義疾耻無勇盜憎攻亦銳葵藿是傾心豺狼何返噬
履險其所受勞賢而相曳攬轡但荒服循垓便私第
嘉慶始獲申恩華復尤繼無庸我先舉同事君猶滯
當推奉使績且結拜親契更延懷安旨曾是慮危際
善謀雖若茲至理焉可替所仗有神道况承明主惠

在洪州答蔡毋學士

旬雨不愆期由來自若時爾無言郡政吾豈欲天欺
常念消塵益惟歡草樹滋課成非所擬人望在東菑

酬王六霽後書懷見示

雲雨俱行罷江天已潤開炎氛霽後滅邊緒望中來
作驥君垂耳爲魚我曝鳃更憐湘水賦還是洛陽才

酬王六寒朝見詒

賈生流寓日揚子寂寥時在物多相背唯君獨見思
漁爲江上曲雪作郢中詞忽枉兼金訊長懷伐木詩

酬王履震遊園林見詒

宅生惟海縣素業守郊園中覽霸王說上激明主恩
一行罷蘭逕數載歷金門既負潘生拙俄從周任言
透迤戀軒陛蕭散及丘樊舊徑稀人跡前池耗水痕
併看芳樹老唯覺弊廬存自我棲幽谷逢君翳覆盆
孟軻應有命賈誼得無冤江上傷行遠林門偶避喧
地偏人事絕時霽鳥聲繁獨善心俱閑窮居道共尊
樂因南澗藻憂豈北堂萱幽意如投漆新詩重贈軒
平生狗知己窮達與君論

登南岳事畢謁司馬道士

將命祈靈嶽廻策請真士絕跡尋一徑異香開數里

分庭八桂樹肅容兩童子入室希把袂登床願啓齒
誘我棄智訣迫茲長生理吸精及自然鍊藥求不死
斯言眇霄漢顧子嬰紛萍相去九牛毛慙嘆知何已

登樂遊春望書懷

城隅有樂遊表裏見皇州策馬既長遠雲山亦悠悠
萬壑精光滿千門喜氣浮花間直城路草際曲江流
憑眺茲爲美離居方獨愁已驚玄髮換空度綠萸柔
奮翼籠中鳥歸心海上鷗既傷日月逝且欲桑榆收
豹變焉能及鸞鳴非可求願言從所好初服返林丘

登襄陽峴山

昔年亟攀踐征馬復來過信若山川曷誰知歲月何
蜀相吟安在羊公碣已磨令圖猶寂寞嘉會亦蹉跎
宛宛樊城岸悠悠漢水波逶迤春日遠感寄客情多
地本原林秀朝來煙景和同心不同賞留歎此巖阿

九月九日登龍山

郡庭常窘東涼野求昭曠楚客凜秋時桓公舊臺上
清明風日好歷落江山望極遠何蕭條中留坐惆悵
東弥夏首闊西拒荆門壯夷險雖異時古今豈殊狀
先賢渺不接故老猶可訪投弔傷昔人揮斤感前匠
自爲本踈散未始忘幽尚際會非有欲往來是無妄
爲邦復多幸去國殊遷放且泛籬下菊還令郢中唱
灌園亦何爲於陵乃逃相

三月三日登龍山

伊川與霸津今日祓除人豈似龍山上還同湘水濱
衰顏憂更老淑景望非春禊飲豈吾事聊將偶俗塵
晚霽登王六東閣

試上江樓望初逢山雨晴連空青嶂合向晚白雲生
彼美要殊觀蕭條見遠晴情來不可極日暮水流清

登郡城南樓

閑閣幸無事登樓聊未日雲霞千里開洲渚萬形出

澹澹澄江漫飛飛度鳥疾邑人半艦艦津樹多楓橘
感別時已屢憑眺情非一遠懷不我同孤興與誰悉
平生本單緒邂逅承優秩謬忝爲邦寄多慙理人術
駑鈇雖自勉倉廩素非實陳力倘無效謝病從芝朮
歲初巡屬縣登高安南樓言懷

山城本孤峻憑高結層軒江氣備宜早林英燦已繁
餘滋含宿霽衆妍在朝暎拂衣釋簿領伏檻遺紛喧
深俯東溪灣遠延南山樊歸雲納前嶺去鳥投遙村
目盡有餘意心惻不可緩竭來彭蠡澤載經敷淺原
春及但生思時哉無與言不才叨過舉唯力酬明恩
美化猶寂蔑迅節徒飛奔雖無立成效庶以去思論
行復徇孤迹亦云吾道存

登樓望西山

城樓枕南浦日夕顧西山宛宛鸞鶴處高高煙霧間
仙井今猶在洪崖久不還金編惟我授羽駕亦誰攀
蒼際千峯遠雲中一鳥閑縱觀窮水國遊思遍人寰
勿復塵埃事歸來且閉關

候使石頭驛樓

山檻憑高望川途眇北流遠林天翠合前浦日華浮
萬井緣津渚千艘咽渡頭漁商多未事耕稼少良疇

自守陳蕃榻嘗登王粲樓徒然騁目處豈是獲心遊
向跡雖愚谷求名亦盜丘息陰芳木所空復越鄉憂

登荊州城樓

天宇何其曠江城坐自拘層樓百餘尺迢遞在西隅
暇日時登眺荒郊臨故都纍纍見陳迹寂寂想雄圖
古往山川在今來郡邑殊北疆雖入鄭東距豈防吳
幾代傳荊國當時敵陝鄂上流空有處中土復何虞
枕席夷三峽關梁豁五湖承平無異境守隘莫論夫
自罷金門籍來參竹使符端居向林藪微尚在桑榆
直似王陵戇非如竇武愚今茲對南浦乘鴈與雙鳧

登荊州城望江

滔滔大江水天地相終始經閱幾世人復歎誰家子
東望何悠悠西來晝夜流歲月既如此爲心那不愁

秋晚登樓望南江入始興郡路

潦收沙衍出霜降天宇晶伏檻一長眺津途多望情
思來江山外望盡煙雲生滔滔不自辨役役且何成
我來颯衰鬢孰云飄華纓握馬苦蹉跎籠禽念遯征
歲陰向晚晚日夕空屏營物生貴得性身累猶近名
內顧覺今是追歡何時平

登臨沮樓

高深不可厭巡屬復來過本與衆山絕况茲韶景和
危樓入水倒飛檻向空摩雜樹綠青壁樛枝掛綠蘿
潭清能徹底魚樂好跳波有象言難具無端思轉多
同懷不在此孤賞欲如何

登古陽雲臺

庭樹日衰颯風霜未云已駕言遣憂思乘興求相似
楚國茲故都蘭臺有餘址傳聞襄王世仍立巫山祀
方此全盛時豈無嬋娟子色荒神女至魂蕩宮觀侈
蔓草今如積朝雲爲誰起

陪王司馬登薛公逍遙臺

常聞薛公淚非直雍門琴竄逐留遺跡悲涼見此心
府中因暇裕江山幸招尋人事已成古風流獨至今
閑情多感歎清景斲登臨無復甘棠在空餘蔓草深
晴光送遠目勝氣入幽襟水去朝滄海春來換碧林
賦懷湘浦弔碑想漢川沉曾是陪遊日徒爲梁父吟

賀給事嘗請蔡起居郊館有詩因命同作

記言聞直史築室面層阿豈不承明入終云幽意多
沉冥高士致休澣故人過前嶺游氛滅中林芳氣和
茲辰阻佳趣望美獨如何

常與大理丞裘公太府丞田公偶詣一所林

山莊集卷之二
三十一
沼尤勝因並坐其次相得甚歡遂賦詩焉以
詠其事

方駕與吾友同懷不異尋偶逢池竹處便會江湖心
夏近林方密春餘水更深清華兩輝映閑步亦窺臨
蘋藻復佳色鳧鷖亦好音韶芳媚洲渚蕙氣襲衣襟
蕭散皆爲樂徘徊徒所欽謂予成夙志歲晚共抽簪

與生公尋幽居處

同方久厭俗相與事遐討及此雲山去窅然巖徑好
疑入武陵源如逢漢陰老清諧欣有得幽閑歛盈抱
我本玉階侍偶訪金仙道茲焉求卜築所過皆神造

歲晚林始敷日晏崖方杲不種緣嶺竹豈植臨潭草
即途可淹留隨日成黼藻期爲靜者說曾是終焉保
今爲簡書畏祇令歸思浩

與生公遊石窟山

林秘孰云遠忘懷復爾同日尋高深意宛是神仙中
躋險邁靈室詭制非人功潛洞黝無底殊庭忽似夢
豈如武安鑿自若茅山通造物良有寄嬉遊迺愜衷
猶希宴玉液從此昇雲空咄咄共携手冷然且馭風

林亭詠

穿竹非求麗幽閑欲寄情偶懷因壤石真意在蓬瀛

苔益山文古池添竹氣清從茲果蕭散無事亦無營
郡舍南有園畦襟樹聊以永日

爲翫久無補越鄉空復深苟能秉素節安用叨華簪
却步園畦裏追吾野逸心形骸拘俗吏光景賴閑林
內訟誠知止外言猶匪忱成蹊謝李逕衛足感葵陰
榮達豈不偉孤生非所任江城何寂歷秋樹亦蕭森
下有北流水上有南飛禽我願從歸翼無然坐自沉

臨泛東湖時任洪州

郡庭日休暇湖曲邀勝踐樂職在中和靈心挹上善
乘流坐清曠舉目眺猶緬林與西山重雲因北風卷

晶明畫不逮陰影鏡無辨晚秀復芬敷秋光更遙衍
萬族紛可佳一遊豈能展羈孤忝邦牧顧已非時選
良公世不容長孺心亦褊未念出籠繫常思退疲蹇
歲徂風露嚴日恐蘭若剪佳辰不可得良會何其鮮
罷興還江城閉關聊自遣

始興南山下有林泉常卜居烏荊州卧病有
懷此地

出處各有在何者爲陸沉幸無迫賤事聊可祛迷襟
世路少夷坦孟門未嶮嶮多慙入火術常惕履冰心
十跌不自保萬全焉可尋行行念歸路眇眇惜光陰

浮生如過隙先達已吾歲敢忘丘山施亦云年病侵
力衰在所養時謝良不任但憶舊棲息願言遂窺臨
雲間目孤秀山下面清深蘿蔦自爲幄風泉何必琴
歸此老吾老過當日千金

高齋閑望言懷

高齋復情景延眺屬清秋風物動歸思煙林生遠愁
紛吾自窮海薄宦此中州取路無高足隨波適下流
歲華空冉冉心曲且悠悠坐惜芳時宴胡然久滯留
與弟遊家園

定省榮君賜來歸是晝遊林鳥飛舊里園菓釀新秋

枝長南庭樹池靈北澗流星霜屢爾別蘭麝爲誰幽
善積家方慶恩深國未酬棲棲將義動安得久情留

郡內閑齋

郡閣書常掩庭蕪日復滋簷風落鳥毛毳窓葉掛蟲絲
拙病宦情少羈閑秋氣悲理人無異績爲郡但經時
唯有江湖意沉冥空在茲

晨出郡舍林下

晨興步北林蕭散一開襟復見林上月娟娟猶未沉
片雲自孤遠叢篠亦清深無事由來貴方知物外心

司馬崔頌和

優閑表政清林薄賞秋成江上懸曉月往來虧復盈
天雲抗直意郡閣晦高名坐嘯應無欲寧辜濟物情
晨坐齋中偶而成詠

寒露潔秋空遙山分在矚孤頂乍脩篁微雲復相續
人茲賞地遍鳥亦愛林旭結念憑幽遠撫躬曷羈束
仰霄謝逸翰臨路嗟疲足徂歲方睽携歸心亟躑躅
休閑償有素豈負南山曲

園中時蔬盡皆鋤理唯秋蘭數本委而不顧
彼雖一物有足悲者遂賦二章

塲藿已成歲園葵亦向陽蘭時獨不偶露節漸無芳

肯異菁爲畜非蔗有漿人多利一飽誰復惜馨香

又

幸得不鋤去孤苗守舊根無心羨肯蓄豈欲近名園
遇賞寧克佩爲生莫礙門幽林芳意在非是爲人論
城南隅山池春中田袁二公盛稱其美夏首
獲賞果會夙言故有此詠

憶昨聞佳境駕言尋昔蹊非唯初物變亦與舊遊睽
幽渚爲君說清晨即我携逢深獨睥睨歷險共攀躋
林筍苞青籜津楊委綠萸荷香初出浦草色復緣堤
樂處將鷗狎譚端用馬齊且言臨海郡兼話武陵溪

異壤風煙絕空山巖徑迷如何際朝野從此待金闈
林亭寓言
林居逢歲晏遇物使情多蘅茝不時與芬榮柰汝何
更憐籬下菊無如松上蘿因依自有命非是隔陽和

南山下舊屋閑放

祇役已云久乘閑返服初塊然屏塵事幽獨坐林間
清曠前山遠紛喧此地踈喬木凌青靄脩篁媚綠渠
耳和繡翼鳥目暢錦鱗魚寂寞心還閉飄飄體自虛
興來命旨酒臨罷閱仙書但樂多幽意寧知有毀譽
尚想爭名者誰云要路居都忘下流歎傾奪竟何如

感遇一

蘭葉春葳蕤桂華秋皎潔欣欣似生意自爾爲佳節
誰知林棲者聞風坐相悅草木有本心何求美入折

其二

幽林歸獨卧滯虛洗孤清持此謝高鳥因之傳遠情
日夕懷空意人誰感至精飛沉理自隔何所慰吾誠

其三

魚遊樂深池鳥棲欲高枝嗟爾鱗游羽薨薨亦何爲
有生豈不化所感奚若斯神理日微滅吾心安得知
浩歎揚朱子徒然泣路岐

其四

孤鴻海上來池潢不敢顧側見雙翠鳥巢在三株樹
矯矯玃木巖得無金丸懼美服患人指高明逼神惡
今我遊冥冥弋者何所慕

其五

吳越數千里夢寐今夕見形骸非我親衾枕即鄉縣
化蝶猶不識川魚安可羨海上有仙山歸期覺神變

其六

西日下山隱北風乘夕流燕雀感昏旦簷楹呼疋儔
鴻鵠雖自遠哀音非所求貴人棄庇賤下士嘗殷憂

衆情累外物怨已忘內脩感歎長如此使我心悠悠

其七

江南有丹橘經冬猶綠林豈伊地氣暖自有歲寒心
可以薦嘉客柰何阻重深運命推所遇循環不可尋
徒言樹桃李此木豈無陰

其八

永日徒離憂臨風懷蹇脩美人何處所孤客空悠悠
青鳥跂不至朱鷺誰云浮夜分起躑躅時逝曷淹留

其九

抱影吟中夜誰聞此歎息美人適異方庭樹含幽色

白雲愁不見滄海飛無翼鳳凰一朝來竹花斯可食

其十

漢上有游女求思安可得袖中一札書欲寄雙飛翼
冥冥愁不見耿耿徒緘憶紫蘭秀空蹊皓露奪幽色
馨香歲欲晚感歎情何極白雲在南山日暮長太息

其十一

我有異鄉憶宛在雲溶溶憑此目不覲要之心所鍾
但欲附高鳥安敢攀飛龍至精無感遇悲惋填心骨
歸來扣寂寞人願天豈從

其十二

閉門跡群化憑林結所思嘯歎此寒木疇昔迺芳蕤
朝陽鳳安在日暮蟬獨悲浩思極中夜深嗟欲待誰
所懷誠已矣旣往不可追鼎食非吾事雲山嘗我期
胡越方杳杳車馬何遲遲天壤一何異幽嘿卧簾帷

當塗界寄裴宣州

故人宣城守亦在江南偏如何分虎竹相與間山川
章綬胡爲者形骸非自然含情津渡闊倚望脰空延
遠近聞佳政平生仰大賢推心徒有屬會面良無緣
日夕遵前渚江村投暮煙念行祇意默懷遠豈言宣
委曲風波事難爲尺素傳

敬酬當塗界留贈宣州刺史裴耀卿

茂生寔王佐仲舉信時英氣覩衝天發人將下榻迎
珪符肅有命江國遠徂征九派期方越千鈞或可輕
高帆出風迥孤嶼入雲平邁邁嗟于役離憂空自情
飭簪陪早歲接壤厠專城曠別心彌軫宏規義轉傾
徒然恨饑渴况乃諷瑤瓊

再酬使風見示刺史裴耀卿

茲地五湖隣艱哉萬里人驚颿翻是託危浪亦相因
宣室才華子金閨諷議臣承明有三入去去速歸輪

唐丞相曲江張先生文集卷之二

終

